

## TIRE GBIKII TE PŌLU U TIMŌTE KUA

Timote u Yesu naane dokewa win aluwaasirun di, sanam me Pōlu u da Lisitiō nōn gbiikiru. Win daaru yiruse sōra u Timote gōsa u ka nūn yōsiri bu Labaari gea kparam da, Gərobun Kookoosu wiru 16:1-3. Timōten tundo u sāawa Gereki, ma win mero u sāa Yuu wi u Gusunən beere yē too, wiru 1:1-5. Pōlu u tire te yoruawa win tākəru sō. U Timote sōwa u nε u de u n tāsā win naane dokebu sō, kpa u Yesun Labaari gean taa geebu ko, kpa win sanu sanusu su n dεere Yesugibun suunu sō, wiru 3:15. U maa nūn ka swaa sōsi ye ya weene Yesun yigbe kparobu ka Gusunən səm kowobu kpuro bu swīi. Meya u maa nūn sōmō nge me Yesugibu ba ko n wāasine. U maa nūn kirō mō u ka sōsi geenu sōsi ni nu dεere keu koosio weesugibun sō.

### *Tire ten kpunaa*

1. Tōbiribu, wiru 1:1-2.
2. Sōsi te Pōlu u Timote wē Yesun yigberu ka ten səm kowobun sō, wiru 1:3n di sere wiru 3:16.
3. Sōsi te Pōlu u Timote wē win sōmburu sō, wiru 4n di sere wiru 6.

### *Tōbiribu*

<sup>1-2</sup> Timote, wunε wi a kua nen bii yēn sō a Yesu naane doke, Gusunō Baaba ka Yesu Kirisi bešen Yinni bu nun durom ka wənwəndu kua kpa bu nun alafia kē. Ne Pōlu, Yesu Kirisin goro nge me Gusunō bešen Faaba kowo ka Yesu Kirisi wi u sāa bešen yīyōbu, ba man yiire, na nun tire teni kuammε.

*Sõosi weesugirun kirɔ*

<sup>3</sup> Tē, na kī a sina Efesuo nge me na nun yiire sanam me na doo Masedoni gia kpa a bu yinari be ba sõosi tukunu sõosimɔ. <sup>4</sup> A bu sõowɔ bu ku raa ben laakari doke jari yi tamba seka sɔɔ, ka maa sikadoban yīsa sɔɔ. Yeya ya sikirinɔsu seeyamɔ, ya n maa Gusunɔn himba wuswaa daasiamɔ ye tɔnu ra gie ka naane dokebu. <sup>5</sup> Adama na yiire bi mɔwa n ka beɛn kīru seeya te ta wee saa gõru ge ga deeren di ka laakari taare sarirugian di ka maa naane doke kpikibun di. <sup>6</sup> Wee, gaba gera saa jari yin min di ma ba kõra sikirinɔ kamgisu sɔɔ. <sup>7</sup> Ba kī ba n sãa Gusunɔn woodan keu sõosiobu, adama ba n ben tiin garin tubusianu yē baa yi ba gerumɔ ka naane baka.

<sup>8</sup> Ka me, sa yē ma wooda ya wã tɔnu ù n ye dendimɔ nge me n weene. <sup>9</sup> Kpa u n yē ma ba n wooda kue gemgibun sã. Ba ye kuawa wooda sarobu ka mem nɔɔ sarirugibun sã, ka be ba n Gusunɔn beere yē, ka durumgibu, ka maa tɔn be ba n Gusunɔ ka gãa deeranun beere yē, ka sere be ba ben tundobu n kun me ben merobu goomɔ, ka maa tɔn gowobu gabu, <sup>10</sup> ka maa sakara kowobu, ka tɔn durɔ be ba kõɔ mennamɔ ben tii tiine, ka be ba tɔmbu gbenimɔ ba dɔramɔ, ka weesugibu, ka be ba weesu sɔɔ bõrumɔn sã, baayere kpuro gesi ye ya kun sãa sõosi geeru. <sup>11</sup> Sõosi te, ta wãawa Labaari gea ye ba man nɔma beria sɔɔ. Gusunɔwa ya ka yã. Wiya u yiiko mɔ, u maa sãa domarun nuuru.

*Siarabu**Gusunɔn wɔnwɔndun sã*

<sup>12</sup> Na Yesu Kirisi beɛn Yinni siara wi u man dam kã n ka nen sɔmburu ko. Na saabu kua yèn sã u

man garisi naanegii ma u man gɔsa win sɔmburu sɔɔ, <sup>13</sup> baa mɛ na ra raa nùn gari kam gerusi ma na nùn nɔni sɔɔwa ma nɛn mɔru ku ra n toma. Ka mɛ, u man wɔnwɔndu kua yɛn sɔ na n̄ yē ye na mɔ, domi na n̄ daa naanɛ doke. <sup>14</sup> Ma bɛsɛn Yinnin durom mu banda nɛ sɔɔ. U man naanɛ dokebu ka kīru wē. <sup>15</sup> Gari naanegii yi yi weenɛ i nɔma gāri i mwa mam mam yiya, Yesu Kiri si u na handunia sɔɔ u ka durumgibu faaba ko bè sɔɔ na s̄a ben kpoko. <sup>16</sup> Adama yenin s̄ona Gusunɔ u man wɔnwɔndu kua, kpa Yesu Kiri si u ka kpī u win suuru nɔru sarirugia s̄ɔsi nɛ sɔɔ nɛ wi na s̄a kpoko, kpa na n ka s̄a yīreru ben s̄ɔ be ba koo nùn naanɛ doke bu ka wāaru te ta ku ra kpe wa. <sup>17</sup> Tɛ, Gusunɔ turo wi, sina boko wi u ko n wāa ka baadommaɔ, wi u kun gbimɔ, wi ba n̄ ka nɔni waare, wigia bɛɛɛɛ ka yiiko sere ka baadommaɔ. Ami.

<sup>18</sup> Timote nɛn bii, na nun yiire bini mɔ nge mɛ Gusunɔn sɔmɔbu ba raa gerua wunen s̄ɔ. A de sɔmɔ ben gari yi, yi n s̄a wunen tabu yānu kpa a ka taa geebu ko <sup>19</sup> a n naanɛ doke kpa wunen ḡɔru ga kun nun taare wēɛmɔ. Adama sibu gabu ba n̄ ḡɔru gen bweseru swaa sue, ma ba ben naanɛ dokebu kam koosia nge goo nimkuu ge ga nim diira. <sup>20</sup> Tɔn be sɔɔra Himɛnɛ ka Alesandu ba wāa be na Setam nɔmu sɔndia bu ka gia ma n̄ n̄ weenɛ bu Gusunɔ gari kam gerusi.

## 2

### *Kanarun gari*

<sup>1</sup> Yen s̄ona na bɛɛ kanamɔ gbiikaa, i n kanaru mɔ tɔmbu kpuron s̄ɔ i n bikiamɔ ka tii kawabu, kpa i n da maa Gusunɔ siare. <sup>2</sup> Nge mɛya i maa kanaru

koowo tem yērobun sō ka sere be ba wāa aye damginu sōo kpuro, kpa su wa su besen handunian wāaru di ka bōri yendu ka alafia, sa n Gusunō beere wēemō kpa sa n daa gea mō. <sup>3</sup> Kana ten bwesera ta wā ta ra maa Gusunō besen Faaba kowo wēre <sup>4</sup> wi u kī tōmbu kpuro bu faaba wa, kpa bu wa bu gem tubu. <sup>5</sup> Domi Gusunō turowa wāa, sannō yakianō turowa maa wāa beše ka Gusunōn baa sōo, wiya Yesu Kirisi wi u kua tōnu, <sup>6</sup> ma u tii wē u kua baawuren abōru. Seeda yera ya sōosira sanam me yen saa ya tura. <sup>7</sup> Yenin sōna ba man gōsa waasu kowo ka gōro, kpa n ka tōn tukobu naanē dokebu ka gem keu sōosi. Geema na gerumō na n weesu mō.

<sup>8</sup> Yen sōna na kī baama mi ba kanaru mō tōn durōbu bu tu ko ba n nōma ye ya dēere sue wōllo n kun ka mōru n kun ka sikirinō.

<sup>9</sup> Mēya maa na kī tōn kurōbu bu tii sōme saka sōo ka girima kpa ben buraru ta kun sāa tara gidigia n kun me wura n kun me goonu, bu ku maa yāa gobi bekeginu doke. <sup>10</sup> Adama ben bura yānu nu n sāa kookoo burasu nge me n weenē kurō be ba tii garisi Gusunō sōo bu ko. <sup>11</sup> A de tōn kurō u gia laakari sōo ka wii kpīibu mam mam. <sup>12</sup> Na n wure tōn kurō u keu sōosi, n kun me u n sāa tōn durōn wirugii adama u n da n maari. <sup>13</sup> Domi Adamuwa Gusunō u ghia u taka kua, yen biru Efa. <sup>14</sup> Mēya n n mō Adamu Setam u nōni wōkua, win kurōwa, u nōni wōkua ma u wooda sara. <sup>15</sup> Adama tōn kurō u koo faaba wa u n bibu marumō u n gesi wāa naanē dokebu ka kīru ka wāa dēeraru sōo ka tii yēru sannu.

### 3

*Yesun yigbe kparobu*

<sup>1</sup> Gari naanegii wee. Goo ù n kī u n sãa Yesun yigbe kparo, sãm geera u kī. <sup>2</sup> N weenewa yëro u n sãa taare sarirugii kpa u n kurɔ turo dege dege mɔ, yen biru u n maa sãa gayagii kpa u n tii yē u kun sãa tɔn bereteke, adama u n sãa sɔbun yaare kowo ka maa wi u koo keu sɔsibu kpī. <sup>3</sup> Kpa u kun sãa tam nɔro ñ kun me sannɔ kīro adama u n sãa suurugii wi u alafia kī, kpa u kun sãa gobin kīro. <sup>4</sup> Kpa u n sãa wi u win yenu nɔma sikerene mam mam, kpa u win bibu mem nɔɔbu ka tɔnun beere wēebu kpuro sɔosi. <sup>5</sup> Domi tɔnu ù kun yē me u koo ko u ka win tiin yenu nɔma sikerena, amɔna yëro wi, u koo ka kpī u Gusunɔn yigberu nenε. <sup>6</sup> N ñ maa weene yëro u n sãa naane dokeo kpaɔ, ye n koo de u n tii gãamɔ kpa u taare wa nge me Setam u wa. <sup>7</sup> Yen biru n weene be ba ñ naane doke ba n yëro win seeda gea dimɔ, kpa bu ku nùn gem, kpa u ku raa maa Setam yina wɔri.

### *Yesun yigbe sãm kowobu*

<sup>8</sup> Meya maa n ñ weene Yesun yigbe sãm kowobu ba n sãa be ba ñ beere mɔ nge nɔsu yirugibu ñ kun me tam yobu ñ kun me be ba ka bwisi kankam gobi kasu, <sup>9</sup> adama ba n naane dokebu n gem me mu tera neni ka gɔru deerɔ. <sup>10</sup> N weene bu maa gina ben laakari mɛeri. Bà n wa ba ñ taare gaa mɔ kpa bu sere ben sɔmburu wɔri. <sup>11</sup> Nge meya n maa weene kurɔbun tii ba n sãa be ba koo beere wē, kpa ba kun sãa tɔn wīɔbu ma n kun mɔ gayagibu be ba naane mɔ kpuro sɔɔ. <sup>12</sup> Kurɔ tia tiawa yigbe sãm kowobu ba kɔ n mɔ, kpa ba n sãa be ba ben bibu ka ben tiin yenusu nɔma sikerene mam mam. <sup>13</sup> Sãm kowo be ba ben sɔmburu mɔ ka nuku tia ba koo ten baruka

di ben wāaru sɔɔ, kpa ba n toro sindu mɔ ben naanɛ dokebu sɔɔ bi Yesu Kirisi sun wɛɛmɔ.

### *Asiri baka*

<sup>14</sup> Na yīiyɔ n na n nun wa, adama na nun tire teni yoruammɛwa, <sup>15</sup> baa nà n tɛɛmɔ, amɛn biru a n ka yɛ nge mɛ n weenɛ a n tii kpare Gusunɔn tɔmbun suunu sɔɔ be ba sãa Gusunɔ Yinni wason yigberu. Yigbe tera ta sãa gem gberɛ ka mɛn maro. <sup>16</sup> Ka gem, goo sari wi u koo kpī u besɛn sãarun asiri yen kpãaru siki.

Gusunɔ u sɔɔsira tɔnun wasi sɔɔ.

Hunde Dɛero nùn gem wɛ.

Wɔllun gɔradoba ba maa nùn wa.

Ba win gari bweseru baatere waasu kua.

Ma ba yi naanɛ doke handunia sɔɔ.

Ma ba kparam nùn sua wɔllɔ u wura win yiiko sɔɔ.

## 4

### *Keu koosio weesugibu*

<sup>1</sup> Adama Gusunɔn Hunde gerumɔ kpasasa ma sanam gam sisi mè sɔɔ gaba koo naanɛ dokebun swaa deri bu hunde koni weesugibu mɛm nɔɔwa, kpa bu maa wɛɛkunun sɔɔsiru swīi. <sup>2</sup> Sɔɔsi te, ta weewa saa wee kowobun min di be ba tii mɛɛra gabu. Tɔn ben gɔru ga gu nge ge ba sii sunsu mani.

<sup>3</sup> Tɔn ben bwesera ba gerumɔ ma n n̄ wã tɔmbu bu suana, yen biru n n̄ maa weenɛ bu dĩanu kpuro di. Adama Gusunɔ u ye kpuro taka kuawa naanɛ dokeobu be ba gem gia bu ka di ka siarabu sannu.

<sup>4</sup> Domi gāanu baanire ni Gusunɔ u taka kua gāa geena, gāanu sari ni sɔɔ, ni ba koo kɔ, adama bu gesi ni kpuro mɔɔ ka siarabu. <sup>5</sup> Domi Gusunɔn gari ka kanara ni kpuro dɛerasiamɔ.

### *Yesu Kirisin sɔm kowo geo*

<sup>6</sup> Wee, à n naane dokeobu bwisi yini kɛmɔ kaa n sãawa Yesu Kirisin sɔm kowo geo, kaa n maa wunen tiin hunde diisiamɔ ka naane dokebu ka sɔɔsi geerun gari yi a swii. <sup>7</sup> Adama a wiira gari yinɔ yi tamba seka kpa a n wunen hunde dendimɔ Gusunɔn beere wɛɛbu sɔɔ. <sup>8</sup> Geema, wasin dendibu arufaani gaa mɔ, adama Gusunɔn beere wɛɛbu bu arufaani kpuro mɔ yɛn sɔ bu gisɔn wãaru ka maa siagirun nɔɔ mwɛɛru mɔ. <sup>9</sup> Gari naanegiiya mi. N wã bu yi nɔma gãri mam mam bu mwa. <sup>10</sup> Yen sɔna sa sunamɔ sa sɔmburu mɔ, domi sa besɛn yiiyɔbu doke Gusunɔ Yinni waso sɔɔ wi u sãa tɔmbu kpuron Faaba kowo, su mam neere be ba naane doke.

<sup>11</sup> A n bu sɔɔsi te yiiremɔ kpa a n bu tu sɔɔsimɔ. <sup>12</sup> A ku de ba n wunen aluwaasiru gema, adama a de a n naane dokeobu kom gen sɔɔsimɔ wunen gari gerubu sɔɔ, ka wunen wãarun kookoosu sɔɔ, ka wunen kĩru sɔɔ, kpa a n naane mɔ ka maa gõru kpiku. <sup>13</sup> Sere n ka tunuma, a n tɔmbu Gusunɔn gari gariamɛ kpa a n bu dam kɛmɔ kpa a n bu keu sɔɔsimɔ. <sup>14</sup> A ku hunden kɛru atafiiru ko te ta wãa wunɛ sɔɔ, te ba nun nɔmu beria Gusunɔn sɔmɔbun gari sɔɔ sanam mɛ yigbɛ guro guroba nun nɔma sɔndi wirɔ. <sup>15</sup> A gari yini nɔni dokeo, a maa yi tii wɛɛyɔ mam mam, kpa tɔmbu kpuro bu wunen wuswaa daabu wa. <sup>16</sup> A n tii sɛ, a maa wunen sɔɔsiru laakari dokeo kpa a n tɛmanɛ gãa nini sɔɔ. Domi à n mɔ me, kaa tii faaba ko ka maa be ba nun swaa daki.

## 5

### *Dobonia naane dokeobun sɔ*

<sup>1</sup> A ku durɔ bukuro gerusi ka dam, adama a tɛmanɔ a nùn dam kɛ nge wunen tiin tundo. Mɛya maa aluwaasiban tii, a bu koowo nge wunen maabu ka wɔnɔbu. <sup>2</sup> N n maa kurɔ tɔkɔnun na, a nin baawure koowo nge wunen tiin mero, a maa kurɔ mero kpɛminu ko nge wunen sesubu daa dɛɛra sɔɔ.

<sup>3</sup> A gɔminibu bɛɛɛ wɛɛyɔ be ba sãa gɔminibu ka gem. <sup>4</sup> Adama gɔmini goo ù n bibu mɔ ñ kun mɛ nikurɔminu, n weenɛ bu gbi bu gia bu gea ko ben tii tiin mero bisibu sɔɔ kpa bu wa bu ben mɔwɔbu gea dibu kɔsia, domi yeni ya wã Gusunɔn mi. <sup>5</sup> Kurɔ wi u sãa gɔmini ka gem wiya wi u ñ goo mɔ wi u koo nùn nɔɔri. Win yĩiyɔbu wãawa Gusunɔ sɔɔ kpa u n kanaru mɔ u n win somiru bikiamɔ bururu ka yoka. <sup>6</sup> Adama gɔmini wi u win wãarun yɛeritia tɔna kasu u kua gɔri kɔ baa mɛ u wasi. <sup>7</sup> A n bu gãa ni kpuro sɔɔmɔ kpa goo u ku raa ka bu taare wɛ. <sup>8</sup> Wi u kun win dusibu nɔɔri n ku mam ko win yenugibu, wiya u naanɛ dokebu yina, ma u naanɛ doke sarirugii dukuram kera.

<sup>9</sup> A ku gɔmini goo sosi gɔminibun wuuru sɔɔ ma n kun mɔ yɛro u wɔɔ wata mɔ, kpa u n sãa wi u ka durɔ turo yɔra, <sup>10</sup> ma ba win sɔm geerun seeda dimɔ. U n sãa kurɔ wi u bibu nɛnum yɛ, kpa u n daa sãa sɔbun yaare kowo ka maa wi u naanɛ dokeobu nɔɔrire ka tii kawabu, kpa u n daa wahalagibu somire, kpa u n sãa wi u ra n sɔm geenu baanire mɔ ka kĩru.

<sup>11</sup> Adama a ku gɔmini kpɛminu sosi gɔminibun wuuru sɔɔ, domi sanam mɛ ben kĩra koo bu bɔria bu ka Kirisi atafiiru ko, ba koo kĩa bu durɔbu sua <sup>12</sup> kpa bu ben tii taare wɛ yèn sɔ ba ben nɔɔ mwɛɛ gbiikiru kua kam. <sup>13</sup> Yèn sɔ ba ñ garu mɔ ba koo

se ba n yenusu duurimə. N n̄ mam ye t̄ona, adama ba ko n da t̄ambu wĩ kpa bu gari wəbia wəri kpa ba n gari swinimə. <sup>14</sup> Yenin s̄ona na k̄i ḡomini kp̄emminu nu dur̄əbu sua kpa bu bibu ma, kpa bu ben yenu n̄oni doke kpa bu ku raa b̄es̄en yiber̄eba ayeru deria bu ka b̄es̄en k̄sa gere. <sup>15</sup> Domi ḡomini ben gaba ḡera k̄ə ba Setam sw̄i. <sup>16</sup> Adama naane dokeo goo ù n ḡominibu mə win dusibu s̄ə, a de u bu somi. A ku de u Yesun yiḡberu s̄əmu ni s̄əbi kpa tu ka kp̄i tu ḡomini be ba kun goo mə somi.

<sup>17</sup> Yen biru yiḡberun guro guro be ba hania mə ben s̄əmburu s̄ə, n weene bu b̄ere bakan arufaani di, n ku mam ko be ba ra sun̄e gem gem waasu ka keu s̄ə̄s̄ibu s̄ə. <sup>18</sup> Domi Gusun̄ə gari yi gerumə yi n̄e, “I ku b̄een naa kin̄enu n̄ə b̄əke saa ye nu s̄əmburu mə d̄ianu s̄ə.” Yi maa gerumə, “N weene s̄ə̄m kowo u win k̄əsiaru wa.” <sup>19</sup> B̄a n ka nun yiḡbe guro guro goon taare naawa, a ku gari yi wura ma n kun mə t̄onu yiru n̄ kun m̄e ita ba yen seeda di. <sup>20</sup> A be ba tora gerusio yiḡberugibu kpuron n̄oni biru kpa be ba tie bu b̄erum duura.

<sup>21</sup> N̄a wure na nun s̄ə̄m̄ə Gusun̄ə ka Yesu Kirisi ka win ḡərado be u ḡəsan wuswaa, a s̄ə̄si nini m̄em n̄əw̄ə n kun ka goon n̄onu nasiaru. A ku maa ḡānu ko kpaasirun k̄irun s̄. <sup>22</sup> A ku maa s̄ənda a ka goo n̄əma s̄əndi. M̄eya, a ku maa de a n b̄ənu mə gabun toranu s̄ə. A tii n̄enu d̄eraru s̄ə.

<sup>23</sup> Wee, a kun da maa nim t̄ona n̄, adama a n da tam n̄ fiiko wunen nukurun alafian s̄ə ȳen s̄ə a ra bare kiri kiri.

<sup>24</sup> Gabun toranu nu ra s̄ə̄s̄ire batuma s̄ə bu sere bu siri. Adama gabuginu ra s̄ə̄s̄irewa am̄en biru. <sup>25</sup> Nge m̄eya maa s̄ə̄m̄ geenun tii, nu ra s̄ə̄s̄ire

kpasasa. Baa ni nu kun tere sã sã nu ñ berurɔ ka baadomma.

## 6

<sup>1</sup> Be ba yoru dimɔ n weene bu ben tiin yinnibu beere wɛ gãanu kpuro sɔɔ, kpa goo u ku raa ka fee wa u Gusunɔn yĩsiru ka besen sɔɔsinu gari kam gerusi.

<sup>2</sup> Yoo be ba maa yinni naane dokeobu mɔ, bu ku raa bu gem bu nee, ba sãa dusinu Yinni sɔɔ. Adama bu de bu yinni be sã ka girima kpa bu ben sɔman arufaani di n kpã yèn sɔ ba sãa naane dokeobu ka maa kĩnasibu Yesu sɔɔ.

### *Sɔɔsi weesuginu*

#### *ka arumani gea*

Yeya n weene a waasu ka keu ko. <sup>3</sup> Baawure wi u sɔɔsi tukururu garu sɔɔsimɔ ma u yina u besen Yinni Yesun Kirisin gari gemgii neene, ka maa sɔɔsi te ta Gusunɔn beere wɛebu sɔɔsimɔ, <sup>4</sup> yɛro u tii suewa, u ñ maa gãanu yɛ. Adama sikirinɔsu ka gari wɛerinun kĩra u barɔ. Min diya nisinu ka sannɔsu ka yaa kasikibu ka tɔn naane sarira wee. <sup>5</sup> Tɔn ben wira sĩra ba ñ maa gem yɛ ma ba sikirinamɔ nɔru sari. Ba tamaa ma Gusunɔn sãaru ta koo bu ko arumanigibu.

<sup>6</sup> Geema, Gusunɔn sãaru ta sãawa arumani baka, ye tɔnu u mɔ yà n ka nùn nekena. <sup>7</sup> Domi sa ñ ka gãanu ganu ne handunia ye sɔɔ, meya sa ñ maa ka gãanu wiɔ. <sup>8</sup> N n men na, sà n dĩanu ka yãnu mɔ n ko n sun turia. <sup>9</sup> Adama be ba kĩ ba n sãa arumanigibu, beya ba ra wɔri kɔkiribu sɔɔ, kpa wiirarun kĩru ka kĩ gɔburu tu bu yina mwa ba n ka dɔɔ kam kobu ka kpeerasiabu sɔɔ. <sup>10</sup> Domi gobin kĩra sãawa

kom kōsum kpuron nuu teeru. Sibū gaba tu naa gira sere ba naane dokebu geerari ba tii kp̄e nuku sankira dabinu s̄o.

*Ye P̄olu u Timote yiire*

<sup>11</sup> Adama wunε Gusun̄gii, a yeni kpuro duka suurio kpa a gem naa gira ka maa Gusun̄n beere w̄εbu ka naane dokebu ka k̄iru ka temanabu ka sere daa duudwia. <sup>12</sup> A naane dokebun taa geebu koowo kpa a w̄āru te ta ku ra kpe are di. Domi w̄ā te s̄ōra Gusun̄o nun soka, ten s̄ōna a maa naane dokebun seeda gea di seedagii dabinun n̄oni biru.

<sup>13</sup> Na nun yiirem̄o Gusun̄n wuswaaō wi u ra yabu kpuro w̄āru w̄ε, ka maa Yesu Kirisin wuswaaō wi u seeda gea di P̄onsu Pilatin wuswaaō, <sup>14</sup> a wooda ye n̄enuō kpa a n w̄ā d̄eeraru ka taare sariru s̄o sere t̄ō te b̄esen Yinni Yesu Kirisi u koo kurama. <sup>15</sup> Gusun̄o, wi u koo de t̄ō te, tu s̄ōsira ten saa s̄o, wi turo dege degewa s̄ā domarugii ka yiikogii ka sina boko ka yinnibun Yinni. <sup>16</sup> Wi turowa s̄ā wi u kun gbim̄o. U w̄ā yam bururam s̄o mε goo kun kp̄ε u susi. Goo kun n̄un waare, goo u n̄ kp̄ε u mam n̄un wa. Wigia beere ka sinaru te ta ku ra kpe. Ami.

<sup>17</sup> A tem men arumanigibun laakari seeyo bu ku woo kana bu ku raa maa ben ȳiȳo bu yi dukia ye ya koo kpe s̄o. Adama bu bu yiyo Gusun̄o s̄o wi u sun kpuro w̄εm̄o ka nuku tia b̄esen nuku do bun s̄ō. <sup>18</sup> A bu s̄ōw̄o bu gea ko bu ko arumanigibu s̄am geenu s̄o, kpa ba n nuku tia m̄o ba n s̄ōru s̄ā bu ka ben m̄aru gabu b̄onu ko. <sup>19</sup> Nge m̄eya ba koo tii arumani gea berua ye ya n̄ sankiram̄o sian s̄ō. Sanam m̄eya ba koo kp̄i bu w̄ā geeru naamw̄ε.

<sup>20</sup> Timote, a ye ba nun n̄omu s̄andia n̄enuō n w̄ā. A d̄esiro saa handunian gari kankamgiin di. A ku

maa sikirina ka be ba tamaa ba yēru mɔ. <sup>21</sup> Ben yēε  
te, ta dera ben gaba kōra naane dokebun swaan di.  
Gusunɔn durom mu n ka bεε wãa.

**Bibeli Gusunɔn Gari**  
**The Holy Bible in the Baatonum language of Benin,**  
**also called the Bariba language**

copyright © 2013 SIM

Language: Bariba (Baatonum)

Translation by: SIM International

**Bariba, Bibeli Gusunɔn Gari**

This translation, published by the UEEB/SIM au Benin, was published in 1996.

If you are interested in obtaining a printed copy, please contact the SIM at SIM, BP 15, Parakou, Benin.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-10

---

PDF generated using Haiola and XeLaTeX on 21 Feb 2024 from source files  
dated 29 Jan 2022  
00601790-b883-5da1-83f2-d05a7fa289a8